



UNIVERSITÄTS-
BIBLIOTHEK
PADERBORN

Universitätsbibliothek Paderborn

**S. D. N. Benedicti XIV. Declaratio Super Matrimoniiis Inter
Protestantes Et Catholicos**

Benedikt <XIV., Papst>

Coloniæ, 1746

VD18 1439684X-001

7. Proponitur Consilium Emin. Card. Besozzi tunc Abbatis S. Crucis.

urn:nbn:de:hbz:466:1-40802

bio respondentum esset, non aliter responderi posset, quām pro nullitate Matrimonii, sed animadversum, id non expedire, ne Catholici periculis exponantur, ex hoc natum est Dubium Ordinario Coloniensi juxta ea, quae in superioribus dicta sunt; In quo proinde rerum themate onus erit EE. VV. decernere.

Quid in proposito casu statuendum sit, aut Ordinario Coloniensi respondentum.

Sacra Congregatio die 17. Januarii 1728. distulit Propositionem: repropensa autem Causā sub diem 21. Februarii rescripsit - *ad Mentem*, quae in literis Coloniensi Officiali datis fuit hunc in modum explicata, quod Matrimonium, ut supra, à præfata Maria Anna contractum ex deductis sit nullum, ac proinde eidem Annæ Mariæ transitus ad alia vota permittatur -- ut in lib. 78. *Decret. pag. 73.* & in lib. *literarum. 27.*

F.

Validitatis Matrimoniorum Hollandiæ.

AD primum Dubium, circa quod de mandato EE. VV. mentem meam aperire debeo, respondendum censerem Affirmativè, loquendo saltem de valore istorum Matrimoniorum in ratione contractus.

Prima ratio, quae ad sic sentiendum me movet, est, quoniam mihi satis verisimile appareat, Caput primum de Reformatione Matrimonii Sess. 24. Concilii Tridentini ad Hæreticorum Republicas, Communitatesque non esse extendendum, id quod & rationem Theologicam, & Concilii Historiam,

&

& Decreti Conciliaris verba probare videntur. Atque ut à ratione Theologica incipiam, hæc est ; Quia Theologi quærentes, quando, & quomodo Lex per interpretationem restringi possit, tria solent principia statuere, primum, quod restrictio Legis fieri potest ad vitandam absurditatem in ipsa Lege, cum nullus Legislator absurdum voluisse præsumendus sit : Secundum est, quod verba Legis ad ad terminos rationis ejusdem Legis restringenda sint, quia Ratio est veluti Anima Legis, & voluntas Principis sola ratione, & non gratis ad legem volendam movetur, quamobrem limitata ratione Lex quoque limitanda erit : Tertium est, quod Lex restringitur ex subjecta materia, cum Legis verba ex subjecta Legis materia intelligenda sint. Quibus principiis post Suarez lib. 6. de Legib. cap. 5. consentiunt Theologi, qui de Legibus tractant, quin & ipse Hugo Grotius de Jure Belli, & Pacis lib. 2. cap. 16. num. 22. in materia Promissionum, quæ restringendæ sint extra significationem verborum, eadem principia tamquam naturæ lumine, & in jure Gentium satis perspicua amplexus est, quæ ejusdem Grotii Commentatores ad Fædera, Leges, & Pacta extendere solent.

Jam verò hæc omnia suadent, laudatum Tridentini Decretum restringendum esse quoad Hæreticos quoque, qui post ipsum Tridentinum suas peculiares Respublicas, Communitatesque constituti forent. In primis, quoniam alias Concilium absurdum voluisset nempe, & infinita quasi adulterina Conjugia, quæ, utcumque materialia dicerentur, sunt tamen, tunc maximè cum sunt innumeralia, semper absurdum, & maxima in legitimarum success-

successionum, ac Hæreditatum confusionem, dubiaque, & anxietates Conscientiæ de valore Mattrimoniorum absque numero, quæ omnia dubio procul absurdâ sunt, nec ita de facili à cordato Viro, & multò minus à summa Charitate, ac prudentia Patrum Tridentinorum deglutienda erant.

Secundò eorundem Hæreticorum respectu cessat ratio, quæ sola plenè, & efficaciter movit Tridentinum ad prædictum Capitulum decernendum, quæ unicè fuit, ut idem Capitulum legenti constat, **damna**, & peccata impedire, quæ ex Clandestinis Matrimoniis oriebantur. Et quæcumque alia ratio in medium proferatur, arbitraria erit, quippe quæ ex ipsius Tridentini verbis, vel Historia minimè resultans. Nec enim sapientissimi Concilii mens fuit contrahentes Matrimonia contra laudatam ab Augustino Christianæ Religionis simplicitatem cæremoniis per qualificatos Testes onerare, sed unicè inconvenientibus obviam ire, quæ ex Clandestinis conjugiis nasci solebant. Istis autem apud Hæreticos sufficienter est cautum per præsentiam Testium, & Magistratus, aut Ministri. Neque dicitur, quod si hoc esset, etiam apud Catholicos Matrimonium absque Parocho in præsentia Magistratum, & Testium valeret Respondetur enim id circò apud Catholicos Matrimonium absque Parocho non valere, quoniam apud Catholicos usu receptum est Conciliare Decretum, & usus est optimus Legis Interpres quoad obligationem ejusdem, cum autem apud Hæreticos non sit usu receptum, hinc apud ipsos obligatio ejusdem Decreti nec in usu, nec in ratione fundatur.

Tertiò cessat quoque materia illius Decreti, quæ circa

circa illa sola Clandestina Matrimonia versabatur,
quæ, utpote clam contracta, & occulta, de iis-
dem, ut ibidem Concilium loquitur, *Ecclesia
non judicat*, Matrimonia autem Hæreticorum hoc
in sensu minimè Clandestina sunt, cum palam, &
in aperto contrahantur.

Hisce positis, jam non unicum verificatur prin-
cipium, quo solo attento Tridentini dispositio ex
mente Theologorum, & eorum, qui de Jure
naturæ, ac Gentium tractant, quoad Hæreticos
limitari deberet, sed omnia tria limitandæ Legis
Principia cum verificantur, omnino sequitur
quoad ipsos Tridentini Decretum non esse exten-
dendum.

Hoc insuper altera corroborat consideratio.
Quemadmodum enim est Juris generalis regula,
quod in generali concessione non veniunt ea, quæ
quis non esset in specie verisimiliter concessurus,
ita in generali prohibitione, vel præcepto non de-
bent ea venire, quæ Princeps non esset in specie
verisimiliter prohibiturus, vel præcepturus, ut
arguit supralaudatus *Suarez num. 11.*, ubi pru-
denter observat generalem illam præsumptionem,
quod nemo in generali sermone comprehendat id,
quod in specie esset nolitus, in jure fundatam
esse, & in ratione naturali, quia, inquit: *Illa
Præsumptio fundatur in defectu voluntatis, qua
præsumitur ex incogititia talium circumstantiarum:* Atqui si Patribus Tridentini fuisset proposi-
tum, an invalida vellent innumera conjugia in
futura post ipsos Hæreticorum populatissima, &
in Colonias quamplurimas in utriusque Indiis, &
Africa diffusa Republicā, profecto pro ipsorum
pruden-

prudentiâ, ne deglutirent supradicta absurdâ, id noluissent, quemadmodum hac ratione, ut mox dicemus, comprehendere Hæreticos sui temporis noluerunt, dicendum itaque est in suo generali decreto futuras Hæreticorum Republicas, communitatesque illis quoque in locis stabilitas, in quibus antea fortassis publicatum Concilium fuisset, non comprehendisse. Quod si nullas prostis excipiendis in suo Decreto apposuerunt particulas, id fuit *ex incogititia futuræ* post ipsos Reipublicæ, Communitatisque Hæreticorum in locis promulgati Concilii quo stante, cum eadem inconvenientia sequuntur in casu non cogitato, à quibus Legislator adhorrebat, si agitur de persona particulari, limitatur lex in *Doctrina Theologorum per Episkeiam*, si verò de Republica, vel Universitate per *Interpretationem* restringi debet.

Verùm ad ipsam Tridentini Historiam descendamus. Etenim si attentè percurratur Capitulum quartum libri 22. Historiæ Concilii à Cardinali Pallavicino conscriptæ, ex ipso num. XII. habetur noluisse Tridentinum infinitorum quasi Matrimoniorum ambiguum esse valorem, & idcirco Episcopi Almeriensis ponderato Voto ex Decreto verba illi sustinuisse *Testimoni digni de fide*, num. autem 25. voluisse, quod in Decreto pars utilis à noxia separaretur, insuperque quod ita extenderetur Decretum, ut maximum inconveniens à P. Lainez consideratum, infinitorum scilicet Adulteriorum perpetratio, & circa legitimas successiones confusio inter illos, *che non ricevessero le Synodali Constituzioni*, quales sunt Hæretici, de medio tollerentur. Jam verò si Tridentinum futuras

turas post ipsum Hæretorum Republicas, Communitatesque comprehendere voluisse, ambiguum reddidisset infinitorum quasi conjugiorum valorem, in Decreto pars utilis à noxia non fuisset separata, nec gravissimis inconvenientibus à P. Lainez consideratis medela fuisset apposita, dicendum est igitur quod, attenta Tridentini Historia, Decretum controversum Hæreticos, de quibus agimus, non comprehendisse.

Neque inverisimile esse dicatur, voluisse Concilium Hæreticos quasi in rebellionis præmium ab hujusce legis vinculo absolvere: Quoniam non in rebellionis præmium, neque in gratiam ipsorum id voluit; Etenim tam futuræ Hæretorum Republicæ, quam qui tunc erant hæretici, rebelles Ecclesiæ erant, eamdemque spernentes, ac irridentes, & tamen istos appositâ publicationis in Parochiis clausulâ certò apud ipsos non securâ voluit excipere, & hoc ne supradicta orientur gravissima incommoda: istis igitur pariter evitandis, & non in præmium hæresis futuras Hæretorum Communitates, si stemus ejusdem Historiæ, ligare noluit. Quod verum est, licet prædicta mala, & incommoda ex Hæretorum malitia oriuntur, quibus nihilominus condescendendum esse rationes illæ suadent, tum quia, ut scribebat Sallustius - *Frustra nisi, & nihil aliud quam odium querere dementia est*, - tum quia si ipsis non indulgeatur, nullus alius fructus habetur, quam quod peiores evadunt, quo in casu suo ingenio cum venia relinquendos esse aperte Canones docent, inter quos cap. *quod dilectio de Consanguinitate, & cap. denique dist. 4. in quo dicitur -*

citur - *Qui à prava consuetudine averti non possunt, aliquando cum venia suo ingenio relinquendi sunt, ne forte peiores existant, si à tali consuetudine prohibeantur.* -

Quod si quis vellet replicare, tum Ecclesiæ Leges circa impedimenta dirimentia ob consanguinitatem, non obstante prava Hæreticorum consuetudine in contrarium, adhuc istos ligare: tum Concilium Tridentinum, quo tunc existentes Hæreticorum Republicas exciperet, clausulam de publicatione in Parochia apposuisse, quam Hæreticos fore omissuros certò credebat: Ex opposito igitur, ubi Hæretici essent in Parochia, in qua Decretum illud publicatum fuisset, mens Concilii erat istos suo Decreto obligare, cum, nemine refragante, oppositorum sit opposita ratio, & disciplina.

Ad primum respondendum est; dato quod assumentur, quod tamen magna cum cautela est admittendum, ne in gravissima incommoda impingamus, quæ hic recensere non est opus, adhuc nostrum casum diversissimum esse. Etenim impedimentum dirimens Consanguinitatis non afficit omnes aliqua in Republica contrahentes, cum non omnes, sed in modico numero sint contrahentes in qualibet Republica, qui inter se consanguinei sint: at in nostro casu Tridentini Decretum omnia Hæreticorum Matrimonia irritaret, quod est id, quod Patres Tridentini, ut ex Concilio Historia perspicuum est, noluerunt.

Ad secundum autem, omisso pro nunc, quod dubia sit, & incerta hæc Tridentini Publicatio in Parochiis Ordinum Fœderatorum, dicimus in nostro

nōstro casu oppositorum non oppositam, sed eamdem esse rationem, cum utrobique eadem gravissima oriuntur incommoda, sive sit publicatum, sive non sit publicatum Decretum Concilii. Quod si pro locis, ubi fortassis publicatum fuit, & postea à nova Hæreticorum Republica occupatis, nullum remedium appositum à Patribus Tridentinis fuit, id, ut diximus, contigit ex hujus casus incogitantia, quem eosdem Patres comprehendeante voluisse in suo Decreto non est credendum, cum nullus Legislator ea absurdā voluisse credendus sit, à quibus eundem in sua lege condenda abhorruisse nos docet ejusdem Legis Historia.

Sed hac in re ipsius quoque Tridentini verba sunt expendenda, ex quibus ad solas Catholicas Regiones, non verò ad Hæreticorum Dominia Decretum suum extendere voluisse videtur: Quoniam in eodem fit mentio de Missarum Solemnissimis, in quibus Publicationes fieri debeant: *de graviter puniendis arbitrio Ordinarii secus facientibus;* quod contrahentes diligenter confiteantur, & ad Sanctissimum Eucharistia Sacramentum prius accedant, quæ omnia quidem pro Catholicis Regionibus optimè quadrant, ac præscribuntur, pro hereticis verò, ut de se claram est, nullo modo. Tota igitur Tridentini Lege perspecta, quo non facta, ut dicitur in L. 24. digestis de Legibus, *incivile est judicare, vel respondere,* habemus ad Catholicas quidem Respublicas, Communitatesque, non verò ad Hæreticos, sive tunc existentes, sive futuras Conciliate Decretum, de quo agimus, fuisse directum.

Secunda ratio, quæ mihi non contemienda vis-

H detur,

detur, est; Quoniam etsi verissimum esse concedam Tridentinum Concilium in toto Belgio, mandante Philippo Secundo, à Gubernatrice Ducili Parmensi fuisse promulgatum, & fortassis etiam in multis quoque ejusdem Parochiis, tamen quod in majori parte Parochiarum Belgii publicatum fuerit nostrum Decretum, id quod ipsum Tridentinum requirit, ut in respectiva Parochia obligaret, consideranti mihi illorum temporum, illarumque Regionum Historiam persuaderi non potest. Etenim præter ea, quæ scribit Burgundus laudatus, tum in eruditissima Relatione Eminensissimi D. Cardinalis de Alsatia, tum in doctissimis Annotationibus Illustrissimi, & Reverendissimi Domini Secretarii Concilii refert *Hugo Grotius Annalium de rebus Belgicis lib. 1.* non alios acrius in Belgio, quam Ecclesiasticos evulgationi Decretorum Concilii intercessisse, quod adeo verum est, ut in suo Edicto anni 1565., quod MS. veteri lingua, & Caractere Gallico reperitur, in uno ex Codicibus Miscellaneorum nostræ S. Crucis Bibliothecæ debuerit ipsa Belgii Gubernatrix Laicis Præsidibus, & Consiliariis Regis mandare, quod Ecclesiasticis invigilarent, an muneri suo circa Tridentinum satisfacerent. Ipsi vero Provinciarum Præsides apud Jo. Isacum Pontanum Historiæ Gelticæ lib. 14. questi plerique sint, ac palam professi continendis ea severitate subditis haud parer se esse. Quin Gabriel Chappuys in Historia Generali Belli Belgici lib. 1. ad an. 1566. narrat quod urgente Gubernatrice executionem Edicti Regii circa Inquisitionem, & Tridentinum Primaria Nobilitas confederata, & unita se oppo-

suit

suit, plures Civitates fuerunt contumaces, ipsa mirante, nec se tutam arbitrante Gubernatrice, quæ Edicta moderari debuerit, ex quo rebelles animosiores facti Regia impedirent Edicta, ipsis, qui se opponere poterant, quiescentibus. Quo in rerum statu non video, quomodo in majori parte Parochiarum Belgii controversum Tridentini Decretum publicatum fuerit, reluctante nobilitate, potentioribus se opponentibus, Civitatibus per contumaciam resistentibus, ipsisque Ecclesiasticis, quorum munus erat Decretum in Parochiis publicare, acrius ipsi Tridentino intercedentibus.

Stante autem quod major Belgii pars Decretis Tridentini restiterit, & Publicatio in majori parte Parochiarum Hollandiæ, & Fœderatorum Ordinum impedita, vel ab ipsis Ecclesiasticis neglecta fuerit, insuperque ignoretur, quibus in Parochiis tale Decretum publicatum fuerit, jam clare non constat in respectivis Parochiis dictorum Ordinum de Publicatione dicti Decreti; Atqui, cum clare non constat de publicatione Decreti Tridentini in aliqua Parochia, standum est pro validitate Matrimoniorum, quæ in eadem Parochia absque forma Concilii contracta fuerint, & hoc ex mente ipsius Sacrae Congregationis Concilii, cuius Decreta laudat Illustrissimus D. Secretarius Concilii num. 54. Standum igitur etit etiam in nostro casu pro Matrimoniorum, de quibus in præsenti agimus, validitate, cum in eodem minimè constet, ubi Concilium fuerit, vel non fuerit in Parochiis publicatum.

Tertia ratio desumitur ex consuetudine apud

H 2

Hære-

Hæreticos celebrandi sua Matrimonia, non servata formâ à Concilio præscriptâ. Consuetudinem autem Legem etiam Ecclesiasticam abrogare Theologis certum est, dummodò hæc tria concurrant nempe quod sit rationabilis, quod adsit scientia Papæ cum ejusdem consensu saltem implicito, & quod debito temporis cursu legitimè præscripta fuerit, quæ omnia in nostro casu concurrere facile persuadetur.

Et in primis quod contrarius Hæreticorum usus de non servanda Concilii forma rationabilis dici possit, id ostendit, quoniam, ut de se constat, non est contrarius juri naturali, vel Divino, quod, ut sit rationabilis, in Canonistarum sententia sufficit; Deinde supposita hæresi Parochos Catholicos, & Tridentini Decreta rejiciente est insuper rationabilis dicta Consuetudo, quia per eamdem suorum Matrimoniorum validitati, sua prolis legitimitati consulunt, & Controversiis de successione in hæreditatibus obviam eunt. Et quamvis ipsa hæresis suppositio sit revera irrationabilis, non tamen quidquid ex eadem consequitur, tale est. Quoniam, mala voluntate supposita, nihilominus postulat naturalis ratio, quod minus malum eligatur, minus autem malum est abrogare in sua Republica aliquam Legem per actus utcumque à principio malos, quam velle in eadem non solum hæresim, verum etiam perpetua adulterina conjugia. Hoc igitur attento rationabilis esse potest dicta Hæreticorum consuetudo, quam etsi daremus malam per respectum ad hæresim, ex qua procedit, non tamen mala dici potest sub respectibus vitandi adulterina conjugia, aliisque

aliisque supra relatis inconvenientibus devitandi.
Quod verò circa talem consuetudinem adsit Pa-
pæ scientia, ostendunt ea, quæ Apostolicæ Sedis
repræsentata fuerunt tum anno 1671. ab Episco-
po Castoriensi, & anno 1711. à Theodoro de
Koch in Belgio Fœderato olim Provicario, à qui-
bus praxis Hollandorum, cæterorumque Ordi-
num Fœderatorum circa Matrimonia celebranda
Tridentini forma non servata in medium produ-
cta fuit. Cui praxi, quod ejusdem Papæ impli-
citus consensus accesserit, plura demonstrant, &
in primis ejusdem consensus Legalis, qui in Cor-
poræ Ecclesiastici Juris exprimitur cap. ult. de Con-
suetudine: Deinde quoniam dictis annis talis pra-
xis ad notitiam S. Sedis deducta non fuit ab eadem
S. Sede prohibita, neque Missionariis, Vicariis-
que Apostolicis præscriptum fuit, quod habere-
tur pro invalida, & nulla, & consequenter tole-
rata fuit, hoc autem ipso ex S. Thomæ doctrina
fuit quoque approbata, qui prima secundæ quest.
97. art. 3. ad tertium, sic scribit; ipsa consuetudo
in tali multitudine prævalens in tantum obtinet
vim Legis, in quantum per eos toleratur, ad quos
pertinet multitudini Legem imponere, ex hoc
enim ipso videntur approbare quod consuetudo in-
troduxit -- Postremò quia cum Papa scit praxim
contra aliquam legem, scit ex lege gravissima ori-
ri incommoda tum Populis Legi refragantibus,
tum Catholicæ Religioni, & Missionariis, nec
ullam ex Legis observatione Catholicæ Fidei inter
illos Populos utilitatem oriri, ut in nostro casu
contingit, tunc si non daret assensum in talis Le-
gis pro dictis Populis abrogationem, impruden-

ter se gereret: cum autem non sit præsumendum Pontificem imprudenter se gerere, hinc præsumendum est in abrogationem talis Legis implicitè consentire, maximè postquam ipse tacet, & tolerat, nec eamdem praxim suis Apostolicis Vicariis ut nullam, invalidamque declarat, à quibus absque ullo contemptu, vel irrisione audiretur. Neque contra hunc tacitum Papæ consensum afferri possunt Decreta Sacrarum Congregationum in contrarium, quoniam, præter ea quæ intra de his Decretis dicemus, nullum contra hanc praxim post annum 1671., quo ab Episcopo Castoriensi in S. Sedis notitiam deducta fuit, nullum inquam Decretum factum fuit.

Tandem quod consuetudo, de qua loquimur, legitimo cursu temporis præscripta fuerit, claram esse videtur, nam legitimus temporis cursus per Theologos, & Canonistas ad consuetudinem contra Legem Ecclesiasticam stabiliendam est quadragenarius, in nostro autem casu dicta consuetudo ab anno 1671. usque in præsens est plusquam quadragenaria, quo temporis intervallo nullum contra eamdem Apostolicæ Sedis, vel Sacrarum Congregationum Decretum prodiit, quo dictus quadragenarius legitimus cursus interrumperetur: Dicere autem, quod nec per mille annos possint Hæretici contra Legem Ecclesiasticam præscribere, valde durum esse videtur. Quoniam Hæretici subditi sunt Ecclesiæ, ac Pontifici, & quilibet subditus contra Leges sui Superioris, hoc vel implicitè, vel explicitè consentiente, præscribere valet.

Scio contra hanc consuetudinem ab Auctoribus
con-

contrariae opinionis communiter objici, tum quod eum proveniat ab infecta hæresis radice omni virtute Legis enervandæ destitui: tum quod Pontificum, & Conciliorum Leges. cum sint à Potestate habita non à Populo, sed immediate à Deo, idcirco non possint per non acceptationem; aut per usum contrarium abrogari.

Verum ad primum dicendum est, quod omnis consuetudo abrogativa Legis ex infecta semper radice provenit, nempe ab actibus illicitis inobseruantia Legis, quamobrem Rei, & obnoxii quidem delicto semper sunt primi, qui per usum Legi contrarium consuetudinem adversus Legem introducunt, non verò alii, qui, consuetudine introducta, operantur, quo sensu in suo Communitorio Vincentius Lirinensis scribebat - *Absolvuntur Discipuli, condemnantur Magistri* --

Ad secundum autem Passerini doctrina repnenda est, qui tom. 2. de Hominum statibus quest. 187. art. 1. num. 429. scribit, quod - *Quamvis absolute loquendo Bullæ Pontificum (quod idem est de Conciliorum Decretis) ad hoc ut obligent, non indigent receptione subditorum, cum proveniant ab Auctoritate Suprema à Christo Domino data Papæ, nihilominus admitti debet doctrina communis, quod scilicet per contrarium usum, & scientiâ Papæ per cursum temporis abrogari valeant, ut dixit Card. in Proemio Clem. n. 7.*

Omitto illam rationem, quæ in S. Thomæ doctrinâ pluribus locis, & præsertim prim. 2. quest. 96. art. 6. in Corpore articuli fundatur, quod videlicet Lex, quæ nullum bonum, nec communionem alicujus Populi salutem promovet, quæ nullum

Ium malum ab aliqua Republica avertit, quin potius malum in eadem causat, virtutem obligandi non habet, cum tunc tali Legi ea, quæ de essentia sunt Legis, deficiant respectu ejusdem Reipublicæ, talis autem, ut rectè rem poneant, apud Hæreticos Ordinum Fœderatorum in Belgio esset Lex Tridentini, de qua agimus, quæ quam noxia ibidem esset non solum Hæreticis, verum etiam Catholicis, Catholicæque Religioni docet *Van Espen.* par. 2. Universi juris Canonicitatis. 12. num. 33. Restat ergo quod Lex ista eodem obligandi virtutem non habeat. Et quamvis mala ista ex Hæreticorum malitia oriuntur, adhuc virtutem obligandi minimè haberet, quoniam tunc, etsi per accidens, homines illius Reipublicæ pejores perseveranter faceret, & contra essentiam Legis est homines perseveranter pejores facere, quam obrem tunc cessat à ratione Legis, id quod etiam innuitur in supra laudato Canone *Denique distinctionis quartæ.*

Hac tamen ratione omissa, postrema ratio est, quoniam est certò probabile hujusmodi controversa Matrimonia esse valida. Et quidem intrinsecam probabilitatem rationes hucusque allatae satis perspicue ostendunt. Extrinsecam autem probabilitatem demonstrant non solum Authores, quos in suis Adnotationibus laudat Illustrissimus Dominus S. Congregationis Concilii Secretarius, quos num. 54. ad quinque & viginti ascendere fatetur: verum etiam quæ scribit supra laudatus *Van Espen.* num. 32. quod scilicet in Gallia, & Germania, ac in Provinciis confœderatis à sexaginta & decem amplius annis hoc communiter fuisse receptum, atque

atque toto quasi Orbe spectante pro validis hujusmodi Matrimonia reputata fuisse. His accedit Ecclesiæ Gallicanæ praxis, de qua ibidem num. 37. idem Van Espen testatur, sicut & omnium quæ Populorum vox, & consensus qui minimè contumendus est, cum vox Populi vox Dei communiparemiâ dicatur, qui omnes Hollandiæ Hæreticos pro legitimis habent. Quibus addi fortassis posset ipsa Apostolicæ Sedis Auctoritas, qui hujuscemodi Hæreticos abjurantes titulo illegitimitatis à Sacris Ordinibus minimè rejicit, nec eosdem unquam vivente uxore, quam in hæresi haberunt, ad alia Vota Matrimonialia transire indulxit, nec eosdem, uxore eadem vivente, ad Sacros Ordines promoveri permisit, quæ omnia ostendunt Apostolicam Sedem ad minus ut certò probabilem dictorum Matrimoniorum valorem admittere.

Neque contra probabilitatem istam plura S. Congregationis Concilii Decreta, quibus Matrimonia hujusmodi invalida declarari videntur, affitantur. Quoniam iteratæ istæ S. Congregationis Concilij resolutiones non possunt improbabilem reddere sententiam nostram, quæ generatim, & universaliter de istorum Matrimoniorum valore procedit, quæ de re nihil unquam generaliter, & universaliter Apostolica Sedes decrevit, testibus omni exceptione majoribus, ipsa videlicet S. Congregatione de Propaganda in suo Rescripto 29. Febr. anni 1704., & S. Congregatione S. Officii in suo Rescripto coram San. Mem. Clemente XI. 19. Novembris 1711., quæ Rescripta in folio ab Illustrissimo D. Assessore communicato recensentur.

H §

Omnes

Omnis itaque resolutiones S. Congregationis Concilii, quæ in medium proferri possunt, vel pro casibus particularibus juxta allegata procedunt, vel supposita Oratorum expositione quod Concilii Decretum ritè fuerit promulgatum, ac usu receptum, nunquam verò generatim factæ fuerunt, in Hypothesi consuetudinis in contrarium, dubiæ promulgationis Decreti, & dubii an Tridentinum Decretum ad Hæreticorum Communitates extendatur. Quin in simili dubio Sacram Congregationem Concilii pro consimilium Matrimoniorum validitate stetisse ex variis ejusdem Congregationis resolutionibus constat, præsertim in una Polonia 13. Novembr. an. 1638. An autem hisce in casibus licita sint hujusmodi Matrimonia, non est præsentis instituti examinare, in quo tantum de valore tractatur.

Certa itaque probabilitate Matrimonia hujusmodi sunt valida quo stabilito, & concessio judicandum absolutè esse pro eorumdem valore mihi perspicuum esse videtur. Quoniam causa Matrimonialis, saltim ubi agitur de Matrimonii vinculo dirimendo, quod Jure naturali, & Divino indissolubile est, est causa gravissima, & Criminibus æquiparatur secundum omnes Doctores, & Rotam apud Farinaccum Decis. Crimin. 94. num. 6. tom. 2., neque enim cum alterius præjudicio debemus nos periculo exponere separandi, quos Deus fortassis conjunxit. Ex quo sequitur, quod ad invalidum declarandum Matrimonium probationes debeant esse concludentes, & luce meridiana clariores: Atqui cum pro validitate Matrimonii certa probabilitas adest, probationes, quæ

pro

pro invaliditate afferuntur, concludentes esse non possunt, neque luce meridiana clariores, alias omnis opposita probabilitas evanesceret, hinc sequitur, quod pro hujuscemodi Matrimoniorum valore sit respondendum.

Hoc ipsum pluribus roboratur, quæ affert Cardenas in *Crisi Theologica Dissert. 2. cap. 8. art. 3.* & sequentibus, tum quia Causa Matrimonialis cap. Finali de sententiâ & re judicata est innegabiliter favorabilis, adeoque validitati matrimonii favendum est: tum etiam quia in dubio pro valore actus est præsumendum, quod in Axioma apud Jurisperitos transiit; Et postremò quoniam hanc esse Rotæ Romanæ praxim idem Cardenas laudatis ejusdem Sacræ Rotæ decisionibus testatur. Quin hanc esse Ecclesiæ mentem scribit P. Vivian par. 2. prop. 1. num. 29. inquiens -- *Rationabiliter Ecclesia vult favere Matrimonio reddendo illud validum, quoties juxta probabiles opiniones contrahatur.* - Et ipsi quoque contrahentes, attenta qualitate contractus de jure naturæ indissolubilis, omni dissolutioni, quæ ex probabilitate sententiæ valori oppositæ oriiri posset, renuntiare censentur.

Quoniam tamen hac in gravissima materia nihil est dissimulandum contra hoc postremum argumentum, quod reflexum Scholastici vocant, tria objici possuat. Primò quod respondit Gregorius XIII. apud Vivam in propositionem 16. Alexandri VII. num. 7. quod scilicet, *In re dubia tutius est adhærere Decreto Tridentini.* Secundò, quod ex cap. 12. de homicidiis, & cap. 5. de Clerico excommunicato, *in dubiis semitam debemus eligere tutiorem,* & cap. 3. de sponsalibus exorto dubio de cuiusdam

Matri-

matrimonii valore Conjuges separandos Pontifex ea ratione decrevit, quia in his, quæ dubia sunt, quod certius existimamus, tenere debemus. Tertiò quod variis Authoribus laudatis docet Ursaya in dissertazione Theologico-legali de Matrimonio Clandestino §. 6. num. 19. *Favorabilitatem*, ut inquit, *Matrimoniorum limitari in Clandestinitate eorumdem, quæ operatur, ut in dubio contra Clandestina Matrimonia, & punibili modo contracta respondendum sit.*

Nihilominus ad primùm dicimus, nihil mirum esse, quod sic responderit Gregorius XIII. quia non agebatur de re, in qua periculum esset ius naturale, ac divinum violandi, & ex qua gravissima sequerentur incommoda, sed quod Episcopi non possent in aliena Diœcesi insuum Confessarium eligere Sacerdotem non approbatum, ex quo nullum periculum, nullumque inconveniens oriri clarum est: Oppositum ex sâpe repetitis in nostro casu contingit, in quo idcirco prudentissimè S. M. Clemens XI. non respondit id, quod responderat Gregorius XIII. sed in supralaudato Decreto Congregationis S. Officii 19. Novembbris 1711. tantum edixit, quod Missionarii prudenter, & juxta probatos Authores se gererent.

Ad secundūm desumptum ex illis Regulis Juris dicendum est, allatas Regulas nostræ potius favere sententiæ, quoniam in nostro casu tutius, & certius esse videtur pro istorum Matrimoniorum valore decernere, ne separemus, quos Deus fortassis conjunxit, & solvamus, quod de Jure naturæ, & Divino indissolubile est, tutiusque est hoc in rerum anfractu in Legem Ecclesiasticam, quam in jus naturale,

tutale, & Divinum cum injuria, & damno contra-hentium & Religionis impingere.

Ad postremum responsio in promptu est, quia Authores, quos laudat Ursaya, loquuntur de Matrimoniis inter Catholicos in regionibus Catholicorum contractis, in quibus absque controversia Concilii Tridentini decretum rite promulgatum, & usu receptum est, ac condentibus inter se partibus de Validitate consensus, quibus in casibus non debemus profecto ita protinus pronuntiare, ut invitati, & reluctantibus conjungantur, sed debitae diligentiae pro inquirenda veritate facienda sunt. Ceterum hisce adhibitis, si res adhuc dubia remaneret, secundum eorumdem Jurisperitorum principia in ipsis quoque Clandestini Matrimoniis standum esset pro valore contractus: Cum itaque noster causus sit diversissimus, & re attentè perpensa probabilis remaneat Matrimoniorum, de quibus controvexit, valor, hinc omnino pro isto resolvendum esse videtur.

Non immoror aliis difficultatibus, quæ contra valorem istorum Matrimoniorum fieri vel solent, vel possunt, quoniam omnes ex dictis facilè solvuntur, & quæ majoris momenti sunt occasione in supra allatis rationibus data, in medium produxi, & solui. Hoc solum addo, quod quamvis, salvo meliorum judicio, valida esse existimem Matrimonia, de quibus agitur, nihilominus tamen omnibus omnino scrupulis prorsus evellendis Pontificiam Declarationem de ipsorum valore expedire opinor eo modo faciendam, quo in ultimi dubii resolutione dicendum erit.

*F. Joachim Besozzi Abbas S. Crucis in
Jerus. S. I. G. Consultor.*

Validitatis Matrimoniorum Hollandiæ.

AD Secundum Dubium respondendum ten-
serem Affirmative. Idque in primis, quo-
niā ut ostendi in resolutione primi dubij,
Controversum Tridentini Decretum non est ex-
tendendum ad Hæreticorum Communitates, cum
autem Legiones istæ sint Hæreticorum Communi-
tates, suos Duces, suos Judices, suos Ministros Hæ-
reticos habentes, suasque insuper Patrias Leges ob-
servantes, hinc ad ipsas non est extendendum Tri-
dentini Decretum, ex quo unicè similiū Matri-
moniorum nullitas dependeret. Quamobrem recte
docuisse opinor P. *La Croix* lib. 6. par. 3. num. 753.
quod Legiones Hollandicæ extra Hollandiam cen-
seantur gaudere eodem jure vel dissimulatione Ec-
clesiæ, quo in Hollandia gaudent, quia, ut inquit,
etiam censeri possunt veluti Parochiæ cum suo
pseudo Parocco ambulantes : Cum autem in Hol-
landia, ut ostendi ad primum dubium, Milites Le-
gionum istarum validè contrahant sua Matrimonia,
idem & extra Hollandiam dicendum esse videtur.
Quod confirmari potest ex eo, quoniam qui casu
absunt, non dicuntur abesse secundum Bartoli do-
ctrinam apud *Sanchez* lib. 3. disp. 18. qu. 2. num.
7. cum autem Legiones istæ casu ab Hollandia, cœ-
terisque Provinciis unitis adsint, hinc ab iisdem
Provinciis non censentur abesse, atqui ut ostendi-
mus in Hollandia, & Provinciis unitis validè con-
traherent, idem igitur dicendum & in Præsidiis, in
quibus casu reperiuntur.

Scio contra hanc resolutionem duo peculiaria
argumenta, & quidem solida, nec contemnenda
objici posse. Primum, quod singulare sit in contra-
ctibus,

etibus, quod contrahentes teneantur stare Legibus dantibus solemnitatem contractibus juxta stylum loci, in quo contrahunt, quæ propositio communiter admittitur ab omnibus ferè Theologis, ac Jurisperitis, & fundatur in Cap. Finali de Foro competenti, atque in L. si Fundus ff. de Evictionibus, extenditurque ad Advenas quoque, ac Peregrinos, qui si in loco, in quo casu & per accidens reperiuntur, Contractum aliquem ineant, tamquam subditi Temporarii Legibus illius loci subjiciuntur: Atqui Milites istarum Legionum contrahunt in loco, ubi certò receptum est, & publicatum Tridentinum, ergo quoad Matrimonialem quoque contractum Tridentini Legibus subjiciuntur. Secundum argumentum est Sacrae Congregationis Concilii recens resolutio in casu specifico Legionum Hæreticorum commorantium ubi Tridentinum est publicatum, quæ legitur apud Sciarra in Additamento ad Theologiam Bellicam cap. 6. num. 16. ubi inter varia dubia Sacrae Congregationis Concilii proposita, eidem à Congregatione S. Officii remissa, & resoluta die 6. Martii anni 1694. Sextum dubium fuit: An milites Acatholici cum Achatholicis mulieribus contrahentes teneantur servare formam præscriptam à Concilio Tridentino: Cui dubio ad Sextum, responsum fuit: Affirmative, in locis, ubi publicatum fuit Concilium, juxta Decretum S. Congregationis 26. Septembris 1602, ad Tertium dubium, approbante S. M. Clemente VIII.

Respondeo tamen ad primum, teneri quidem contrahentes servare solemnitates in Contractu, ad hoc ut validè contrahant, juxta leges, & consuetudines

dines loci, in quo contrahunt, si tales Leges, consuetudinesque generales sint, & comprehendant omnes, ac quoscumque contrahentes, secus si sunt speciales pro tali tantum hominum genere: cum autem, ut ex dictis pro resolutione primi dubii, Tridentini Decretum non fuerit generale pro omnibus Christianis, sed speciale pro Catholicis tantum, non autem pro Hæreticis Communitatibus, hinc consequitur illos, qui de Communitate hæretica sunt, ubicumque ista reperiatur, Tridentini Decreto, ut potè pro ipsis minimè lato, ubicumque sint, non teneri. Quod exemplificari potest in Legibus circa Ritus, & Liturgiam pro Latinis Ecclesiasticis latis, quæ Græcos minimè ligant, etiamsi isti in locis Latinorum reperiantur. Quin et si pro Hæreticis quoque controversum Tridentini Decretum latum fuisset, eidem legitima consuetudine fuisse derogatum ex dictis ad primum dubium ostensum est.

Ad secundum dico, quod allatum S. Congregationis Concilii Decretum, sicuti & alia consimilia, quæ afferri possunt, facta fuerunt, attentis unicè recurrentium precibus, & iis quæ in istis allegabantur, non verò expenso, an Tridentini Decretum ad præsentium Hæreticorum Communitates extendatur, sicuti nec expensa Hypothesi consuetudinis in contrarium: Quamobrem eadem Sacra Congregatio de persistentia, & perseverantia in consimilibus Decretis dubitavit, & quidem merito, cum non sint Definitiones ex Cathedra, & idcirco novum de hac materia demandavit examen, quod non fecisset, si in Decretis perseverare voluisset, cum tunc satius su-

perque

perque fuisset eidem S. Congregationi in casu præsentium dubiorum respondere: Communicentur Decreta jam edita; Cum autem re nunc examinata ostensum fuerit Tridentini Decretum ad Hæreticorum Communidades minimè extendi, quod et si extenderetur, per consuetudinem in contrarium fuisse abrogatum, quin & fuisse abrogatum hoc ultimum S. Congregationis decretum, quod laudatur legitimo temporis cursu plusquam quadragenario, cæterisque ad legitimam consuetudinem, ut ex dictis ad primum dubium, concurrentibus, hinc consequitur, quod non obstante laudato S. Congregationis Concilii Decreto, pro validitate Matrimoniorum, de quibus in secundo dubio quæritur, standum esse videatur.

Ad tertium, & quartum censerem respondendum, ut ad secundum ex iisdem momentis proportione servata, iisque expensis, quæ pro resolutione primi dubii ponderabam, videlicet quod verba Decreti Concilii Tridentini ad Catholicos, non verò ad Hæreticos dirigi videntur.

Ad quintum, sextum, & septimum distinguendum esse censerem: Vel enim in locis, ubi celebrantur dicta Matrimonia, habetur Parochus Catholicus, vel Missionarius vice Parochi fungens, vel non habetur: si primum invalida censerem, si verò secundum valida esse existimarem. Ad primam resolutionis partem sequenti ratione mo-
veor, quoniam ut sit simpliciter, & absolutè va-
lidus contractus Matrimonialis, debet esse vali-
dus ex parte utriusque contrahentium, contra-
ctus enim Matrimonialis est contractus mutuus,
& in hoc genere contractuum ad Validitatem eo-

I
rumdem

rumdem intervenire debent essentialia ex parte utriusque, ut de se est perspicuum: cum autem respectu partis Catholicæ in casu præsentium dubiorum validus esse non possit ob defectum proprii Parochi, quem ipsa habet, & adhibere tenetur, erit igitur simpliciter, & absolute invalidus in nostro casu contractus Matrimonialis, adeoque invalida Matrimonia, de quibus agitur, censenda sunt.

Quod pars Catholicæ proprium Parochum habeat in præsenti suppositione, clarum esse videtur, quoniam vel ibi eadem habet domicilium, ubi Parochus Catholicus, vel Missionarius vice Parochi fungens reperitur, & tunc istum esse Parochum proprium partis Catholicæ certum est ex cap. ultimo de Parochis, in quo decernitur, ex *Domicilio unumquemque sortiri Parochum*: vel ibidem domicilium non habet, & tunc ibidem Vaga; & Peregrina censenda est; Vagi autem & Peregrini, ne sint Oves absque Pastore, habent pro proprio Parocho Parochum loci, in quo vagantur, coram quo juxta notam Tridentini doctrinam validè contrahunt. Proprium igitur Parochum in nostro casu Pars Catholicæ habet.

Quod verò pars Catholicæ eundem Parochum adhibere teneatur, ut validè contractum Matrimoniale ineat, plura suadent, & primo, quod pro eadem non militant rationes, ob quas probavimus Decretum Tridentini ad Hæreticos, Communidades, hominesque minimè extendi: Secundo, quia Ecclesia, & Romani Pontifices semper detestati fuerunt Matrimonia inter partem Catholicam, & Hæreticam, quamobrem non est præsumen-

Lumenadus eorumdem consensus, sive licentia, & dissimulatio, in id quod hujusmodi Matrimonia facilitaret, videlicet quod pars Catholicæ cum Hæretica sine solemnitate à Tridentino præscripta Matrimonium contrahat. Tertio quia in Hollandia, & Provinciis unitis, ubi reperitur Parochus Catholicus, vel Missionarius vice Parochi fungens, ibi respectu Communitatis Catholicæ præsumendum est fuisse publicatum Tridentini Decretum, ubi autem Tridentini Decretum præsumitur publicatum, & quidem præsumptione in Jure, & Lege fundata quoad aliquam Communitatem, & Parochiam, si isti absque Tridentini solemnitate Matrimonium contrahant, nulliter contrahunt, certum est.

Sola difficultas est, an Tridentini Decretum præsumendum sit publicatum in Hollandia, & Provinciis unitis quoad Catholicas Communitates in locis, ubi reperitur Parochus, vel Missionarius Catholicus, & quidem præsumptione in Jure, vel lege fundata. Qua in re partem affirmativam persuaderet, quoniam Catholicæ in iisdem Provinciis, ubi reperitur Parochus, vel Missionarius Catholicus, contrahere Matrimonia solent coram eodem Parocho, vel Missionario, & testibus juxta præscriptum Tridentini Concilii, eo autem ipso præsumendum est apud eosdem ibidem commorantes Catholicos Tridentini Decretum fuisse promulgatum, & quidem præsumptione fundata in Jure, vel Lege, quoniam habemus Decretum S. Congregationis Concilii in una Indianorum Orientalium die 30. Martii 1669. ita decernens - Præsumendum autem esse, quod fuerit

hoc modo publicatum, si de tempore, vel praesenti, vel præterito extet memoria, quod Matrimonia contrahi soleant coram Parocho, aut Missionario, & testibus tamquam ex præscripto ejusdem Concilii. -

Neque mihi objiciatur, quod in resolutione primi dubii inter alia existimabam, videlicet non constare in Hollandia, & Provinciis unitis, ubi ritè promulgatum, ac receptum Tridentinum fuerit. Quoniam in eodem sensu constans sum quoad **Communitates**, & Parochias Hæreticorum, nego verò quoad **Communitates**, & Parochias Catholicorum, postquam observantiam nostri Decreti Vicarii Apostolici urgere non cessarunt, & illud ipsum Decretum in usu apud Catholicos fuit receptum.

Doctrinæ huc usque allatæ inniti, & eamdem confirmari opinor per Decretum S. Congregacionis S. Officii die 15. Maii anni 1720., quod refertur ultimo loco in Foliis ab Illustrissimo D. Professore S. O. communicatis, in quo ab Eminentissimis Patribus, audita unanimi DD. Consultorum sententia, nullum fuit declaratum Matrimonium cuiusdam Itali, qui in Belgio confederato Matrimonium cum Acatholica coram Ministro Hæretico bona fide contraxerat, nullum, inquam, fuit declaratum ea ratione, *ut non contractum coram proprio Parocho*. Proprius autem Parochus hujus Itali in Belgio Fœderato tunc commorantis alius esse non poterat, quam Parochus, vel Missionarius Catholicus, qui ibidem tunc fortassis haberi poterat.

Sin autem in locis, ubi celebrantur Matrimonia,

nia
bio
Mil
ead
trin
Car
qua
tiar
Ma
pri
D.
tini
nec
eju
erg
cum
qu
no
roc
di
qui
fir
tho
dic
cer
tan
ta,
co
qu
Pa
ju

nia, de quibus in quinto, sexto, & septimo du-
bio agitur, non adsit Parochus Catholicus, vel
Missionarius vice Parochi fungens, sed utroque
eadem loca destituta sint, tunc controversa Ma-
trimonia fore valida ostenditur ex nota Epistola
Cardinalis Bellarmini Octavio Nuntio Apostolico,
quae habetur apud Sylvium supplemento in ter-
tiam partem quæst. 45. art. 5. in qua legitur - De
Matrimoniis contractis, ubi nulli jam sunt pro-
prii Pastores, jam olim actum fuit cum Sanctissimo
D. N., & cum Congregatione Concilii Tridentini,
ac sententia communis fuit illa esse rata,
nec ad ea pertinere Decretum Concilii, cum in
eiusmodi locis observari non possit, non video
ergo, cur ea Matrimonia non debeant tolerari,
cum satis constet Concilii Tridentini Decretum,
quod jubet Matrimonium fieri coram Parocho,
non se extendere ad ea loca, ubi nulli sunt Pa-
rochi. -

Ad octavum Respondeo negativè, idque ex
dictis ad quintum.

Ad nonum Respondeo, quod eadem ratione,
quam ad antecedentia dubia attuli, invalida exi-
stimo talia Matrimonia. Quoniam etsi pars Ca-
tholica Legionibus Fœderatorum Ordinum sit ad-
dicta, fit quidem, quod quoad effectus Civiles
censeatur de communitate talium Legionum, non
tamen quoad Ecclesiasticos, & quoad Sacramen-
ta, in quibus nulla communicatio inter Catholi-
cos, & Hæreticos intervenire debet: Maximè
quod in nostro casu Pars Catholica habet proprium
Parochum Catholicum, illum videlicet, in cu-
jus Parochia sunt stativa, in quibus commoratur:

quemadmodum Milites nostri Catholici , nisi speciali Pontificis privilegio sint exempti , censentur habere pro proprio Parocho illum , in cuius Parochia sunt Stativa , quæ inhabitant . Cum igitur Pars Catholica proprium habeat Parochum , & contrahat in loco , ubi Tridentinum est publicatum , hinc consequens omnino est , quod si absque Concilii Solemnitate Matrimonium contrahat , nulliter contrahat .

Ad decimum ut ad nonum immediatè prædens .

Ad undecimum Loquendo de Matrimonio , quæ in Civitate Mosæ Trajectensis ab Hæreticis inter se contrahuntur , hæc valida esse censerem ob dicta ad primum , secundum , tertium , & quartum Dubium : Loquendo autem de Matrimonio , in quibus Pars Catholica contrahit , invalida existimarem ob dicta ad quintum , & sequentia Dubia .

Ad Duodecimum quoad primam partem consulendum esse Sanctissimo pro opportuna declaratione censerem ; Quoniam cum dubia ista Episcoporum , Missionariorum , ac Fidelium mentes jam à multo tempore torqueant , anxiique , & ignari sint , quo tutò se vertant , hinc Magisterii Pontificii est eadem solvere , & sic Fidelium conscientias , Episcoporum , & Missionariorum mentes quietas reddere ; ne de Sancta Sede illa fiat querela : *Parvuli petierunt Panem , & non est qui porrigit eis.* Hocque muneris Pontificii , & quidem debiti est , ut apertè simili in materia exorti dubii ex intelligentia Concilii Tridentini S . Pius V. professus est in declaratione dubij circa impe-

impedimenta Cognitionis Spiritualis in Matrimonio, quæ habetur in Septimo Decretalium lib. 4. Tit. 2. cap. 3. ubi dicit-Officii nostri debitam prosequimur actionem, si obscuros Sacrorum Canum sensus ita aperire studemus, ut piis Christi-Fidelium mentibus nulla dubitandi occasio relinatur. Quamvis autem S. Officii Congregatio anno 1671. responderit non convenire, quod hæc quaestio S. O. definiretur, id fortasse fuit, quia hæc resolutionis propriè non ad S. O., sed ad S. Congregationem Concilii pertinebat, vel quia nondum consuetudo, praxisque inoleverat, quod valida hujusmodi Matrimonia censerentur, vel postremò quia nondum replicatis precibus Catholici Belgii Episcopi anxietates, scrupulosque suos hæc in materia pro opportuno remedio S. Sedis operuerant, quamobrem saluberrimam modò declarationem opinor, qua inextricabiles anfractus, ambagesque circa similia Matrimonia præcidantur, eamdemque expedire jam olim Estius, & Pontius Auctores Catholici non contemnendi censuerunt.

Quin si mentes Eminentissimorum Patrum in eam partem inclinarent, quæ sentit invalida esse Hæreticorum Matrimonia, de quibus in primo, secundo, tertio, & quarto dubio agitur, nihilominus consulendum esse Sanctissimo censerem, quod istorum Matrimoniorum validitati imposterum, futurisque temporibus provideret. Idque primo, quoniam hac ratione multis, innumerisque adulterinis conjugiis, multisque conscientiarum anxietatibus, & circa legitimas Hæreditates dubietatibus remedium opportunum exhiberet, quæ fuit quoque ut in dictis ad primum dubium, prudenter tissima.

tissima, Charitateque plenissima mens Tridentini Concilii. Secundò, quia cum apud Hæreticos in consuetudine sint Matrimonia absque forma à Tridentino præscripta, semperque & jugitur absque ulla spe resipiscientiæ in eadem consuetudine perseveraturi existimantur, hinc pro iisdem Tridentini Decretum inutile esse videtur secundum S. Thomæ doctrinam prim. 2. quest. 97. art. 3. ad 2. scribentis -- cum tales actus multiplicantur (loquitur de actibus contra Legem,) propter aliquam mutationem hominum, tunc manifestatur per consuetudinem, quod Lex ulterius non est utilis -- Quando autem Lex pro aliquo hominum cætu utilis non est, tunc ista pro eodem de medio est tollenda, cum ipsi tunc non expediatur. Quamobrem idem S. Thomas loco laudato art. primo, in quo quærit, An lex beat mutari aliquo modo, in corpore articuli concludit -- Ex parte hominum, quorum actus Lege regulantur, Lex rectè mutari potest propter mutationem conditionum hominum, quia secundum diversas eorum conditiones diversa expediunt -- Tertiò quoniam hoc modo Hæreticorum conversioni facilius consulitur, nam multò difficilius convertuntur, qui in conversione alterum Conjugem, si iste converti nolit, dimittere debet. Nec semper in bona Fide relinquī possunt, quia ut S. Congregationi Concilii Irenensis Episcopus in tertio catu exposuit, inter colloquendum à Civibus Catholicis de talium Matrimoniorum validitate scrupulus injicitur. Postremò, quoniam ex supra laudato cap. Denique §. De ipsa dist. 4. capit. 6. -- Quia prava consuetudine averti non possunt, aliquando *cum venia suo ingenio reliquendi* sunt,

ne fortè pejores existant, si à tali consuetudine prohibeantur -- Quod ipsum ferè in cap. *Quod dilectio de consanguinitate* decernitur.

Quemadmodum igitur, ut est notum Jurisperiti dictum -- nulla ratio Juris, aut æquitatis benignitas patitur , ut quæ salubriter pro salute hominum introducuntur, ea nos duriori interpretatione contra ipsorum commodum perducamus ad severitatem-- Ita quoque nulla Juris ratio, aut æquitatis benignitas in Romano Pontifice patitur , ut quæ à Concilio Tridentino salubriter pro animarum salute præscripta fuerunt eadem pro illis! Pontifex manutene , & urgere perseveret , contra quorum salutem sunt eorumdem ab Hæresi conversionem difficultorem reddendo. Hoc igitur in casu, ut eleganti S. Cyrilli similitudine utar , Pontifex *Nautarum prudentiam imitabitur*, quæ quedam exonerat , ut cætera *salva maneant*; Atque ita verum se ovium quoque istarum errantium Pastorem exhibebit, cui incumbit tollere , cum potest , obstacula , quæ iisdem redditum ad ovile difficultorem reddunt, qualis est, ut dixi, prædictus nullitatis effectus in Tridentini Decreto. Quo temperato , ut ferè S. Augustini verbis utar , *majoribus malis sanandis Charitas sincera subveniet*.

Providere autem poterit talium Matrimoniorum validitati in posterum, non quidem abrogando, vel derogando Concilii Tridentini Decreto, sed unicè pro nunc, quatenus opus sit, suspendendo nullitatis effectum quoad Hæreticos , de quibus agitur, donec Deo eorumdem corda illuminare placuerit. Ita enim meâ sententiâ , Tridentino Concilio debita reverentia, suusque honos servaretur, non tol-

lendo de medio ejusdem Decretum, sed ejusdem tantum nullitatis effectum, Ecclesiasticâ Economâ, ratione temporum, locorum, & personarum, quæ à prudente Legislatore in consideratione habenda sunt, suspendendo.

Quin hoc ipsum Sanctissimo faciendum consulerem, etiam si Eminentissimi Patres valida Matrimonia, de quibus agitur, existimarent. Atque hoc ut omnes prolsus scrupuli evellantur, qui ex probabilitate oppositæ sententiæ possent oriri;

Quoad secundam ejusdem dubii partem, vide licet, quæ Declaratio à Sanctissimo fieri debeat, censerem hanc Declarationem non esse faciendam per Bullam, aut Breve, quoniam hæc Declaratio vel erit de validitate Matrimoniorum, quæ ab Hæreticis contrahuntur, & tunc cum istorum favorem concernat, non est solita S. Sedes interloqui per Bullas, aut Brevia Hæreticorum favore, vel erit de invaliditate, & tunc multò minus expediret, quod tamquam illegitimi per Bullas, & Brevia traducantur, ne in Catholicos cum damno Religionis exacerbentur. Faciendam igitur talem Declarationem existimarem per Sanctissimum suam unicæ mentem, prout ipsi Deus inspiraverit, aperiendo Illustrissimo D. Secretario Concilii, à quo in Registris Congregationis annotetur, Episcopisque Belgij pro eorumdem regula communicetur.

Ita circa dubia mihi communicata censerem, falvo semper &c. me tamen &c.

*F. Joachim Besozzi Abbas S. Crucis in
Jeruf. S. R. I. Consultor.*

Hol-